

L'ischla da Strada chi'd es gnüda revitalisada i'ls ons 1996 fin 2000 es d'importanza nazionala.

FOTOS F. ANDRY

Tut suot ögl la vita a la riva da l'En

WWF grischun ed austriac han collavrà

DA FLURIN ANDRY /ANR


■ **Cul sustegn da la Pro Terra Engiadina es gnü realisà a Strada e sper Puntina a l'istess mumaint ün di suot l'insaina da l'En. Ill'ischla da Strada es gnü tematisà eir il castor chi'd es da return.** In sonda passada d'eiran invidadas famiglias ed interessats a la natüra ad ün di internaziunal a la riva da l'En. In Svizra ha gnü lö quel di illas ischlas da Strada ed in Austria a Völs, al vest da Puntina. «Il böt da quists dis es da render attent a la glied quant important cha'l

spazi vital flüm e sias rivas es per bleras creatüras e plantas», ha declerà *Anita Wyss* dal WWF grischun. Ch'els organischan da quists dis sper l'En fingià pella terza jada, ha agiunt sia collega *Elisabeth Sötz* dal WWF austriac. Ella ha seis büro a Puntina e coordinescha la collavrasiun tanter ils pajais alpins, da la Slovenia fin Frantscha. «Quists dis muossan als partecipants, gronds e pitschens, da maniera fich concreta chi chi viva sper ed ill'aua da flüms ed auals in muntogna», ha ella manzunà, «nossa visiun füss da

pudair organisar in ün pèr ons da quists dis a l'En na be i'l Tiroil ed in Grischun, dimpersè eir in Oberösterreich ed in Baviera.»

Plüssas staziuns cun differentas activitats

Procurà pels contacts necessaris e güdà ad organisar il di in sonda a Strada vaiva la Fundaziun Pro Terra Engiadina (PTE) culla manadra da gestiun, la biologa *Angelika Abderhalden*. Ella ha explicchè als differents preschaints, indigens singuls e



cun uffants, il program dal di. Lung l'En d'èiran pronts in differents lös expertas ed experts. Els vaivan preparà explicaziuns teoreticas, ma eir demonstraziuns concretas e pussibilitats impustüt pels uffants dad experimentar. *Thomas Kohl* da la PTE ha preschantà co cha plantas piunieras rivan, cun lungas ragischs, da chat-tar nudritüra eir i'l terrain da sablun e crappa illas ischlas. *Nicole Ackermann* dal WWF grischun ha muossà p. ex. a man dad experimaints la differenza da lets da flüm cun stortas e da quels chanalisats. *Birgit Kohl* (PTE) ha invidà als interessats a lavurar da maniera creativa cun materials natürels. *Rosmarie Walter e Regula Buechler* (PTE) han preschantà il spazi vital «flüm». Cun *Mathis Müller* da la Vogelwarte Sempach sun ils preschaints its in tschercha dals stizis da bes-chas chi vivan ill'aua o a la riva.

«Castors a Pradella, Bever e San Niclà»


Interess han svaglià impustüt las explicaziuns da Müller davart ils castors chi sun rivats avant desch ons aint da la Baviera e Tirol in Engiadina. «Il prüm castor

s'haja observà da prümavaira 2008 a Pradella, set ons plü tard s'han quels riprodüts e miss in viadi sü vers l'Engiadin'Ota. A Bever ingio cha l'En vain revitalisà chattan quistas bes-chas ün bel dachasa.» El ha eir dit chi s'haja chattà stizis d'ün castor in stretta vicinanza da San Niclà. In connex culs dons pussibels da quists castors ha manà Müller ch'in Engiadina nu saja d'avair temma da quists dons sco chi saja il cas p. ex. illa Val dal Rain. Il perit ha dit chi saja probabelmaing rivada in Engiadina eir almain üna lutra. Interessà han eir las explicaziuns da *Hans Schmocker* davart ils amfibus e reptils indigens. El lavura pel center da coordinaziun per quistas bes-chas svizzer Karch e pel center grischun Bigra. Cur ch'el ha tut our da duos sachs üna vipra masculina ed üna feminina nu faivan be ils uffants ögliuns. Schmocker vaiva chattà quistas duos serps illa Val Susauna. Ch'el nu sapcha scha quai saja eir l'influenza da l'Austria in stretta vicinanza, ha dit Schmocker cun ün rierin, «mo eu n'ha chattà a Sent üna natra glischa cun üna lunghezza da 90 centimeters. Quellas ch'eu n'ha masürà i'ls contuorns da

Cuoira invece d'èiran be 50 fin 60 centimeters lungas.»

Cudesch davart auas preziasas in Svizra

Al stand dal WWF grischun ha Wyss rendü attent ad üna nouva publicaziun, al cudesch «Gewässerperlen/Die schönsten Flusslandschaften der Schweiz». Ses da quistas perlas sun in Grischun. La vernissascha dal cudesch es als 5 da lügl i'l local da cultura dal Bogn Engiadina Scuol cun l'autur *Urs Fitze, Anita Mazzetta* chi maina la gestiun dal WWF grischun e *Philipp Gunzinger* chi presidiescha il Forum Engiadina Bassa/Val Müstair. Implü ha Wyss eir rendü attent a las excursiuns cha'l WWF chantunal organischa in gon illa regiun: «Als 22 lügl scuvrina cun l'ornitolog *David Jenny* la Val Chamuera ed als 15 settember maina la pedagoga pella natüra *Nicole Ackermann* a famiglias ed interessats tras la Val Clemgia sülla tschercha dals stizis istorics da l'uman.» I'l prossem on prevezzan WWF e Pro Terra Engiadina d'organisar ün di a la riva da l'En eir pellas scoulas da la regiun.



La Quotidiana
7007 Cuir
081/ 255 57 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'063
Erscheinungsweise: 5x wöchentlich

Seite: 9
Fläche: 122'196 mm²

Auftrag: 1026594
Themen-Nr.: 808.008


Referenz: 70017731
Ausschnitt Seite: 3/5



Priska e Jakob taidlan las explicaziuns da Rosmarie Walter chi ha muossà quantas bes-chas e bes-chinas chi vivan a la riva ed i'l flüm svesa.



Thomas Kohl ha demonstrà quant lungas cha las ragischs da plantas pionieras vegnan per pudair surviver sül terrain sablunus e crappus dad ischlas.



La Quotidiana
7007 Cuir
081/ 255 57 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'063
Erscheinungsweise: 5x wöchentlich

Seite: 9
Fläche: 122'196 mm²

Auftrag: 1026594
Themen-Nr.: 808.008

Referenz: 70017731
Ausschnitt Seite: 4/5



Il salamander alpin daja, sco cha Hans Schmocker ha dit, be d' inrarischem in Engiadina.



Hans Schmocker ha muossà il bel muoster sün la pel da la vipra.




La Quotidiana
7007 Cuir
081/ 255 57 10
www.laquotidiana.ch

Medienart: Print
Medientyp: Tages- und Wochenpresse
Auflage: 4'063
Erscheinungsweise: 5x wöchentlich

Seite: 9
Fläche: 122'196 mm²

Auftrag: 1026594
Themen-Nr.: 808.008

Referenz: 70017731
Ausschnitt Seite: 5/5



castor, qua be ün giovaret, es landervia a's reconquistar l'Engiadina.



Nicole Ackermann ha demonstrà cha l'aua cula bainquant plü plan scha'l let d'ün flüm fa stortas.